


啓雋類函  
 体近九之十



漢書門類			
四八冊	四架	二函	一四〇號

內閣文庫			
三六冊	二函	一四〇號	漢書

內閣文庫			
番號	漢	11400	
冊數	48 ( 11 )		
函號	364	52	



啓雋近體卷九

類函二十一

東吳俞安期羨長彙編

上饒王嗣經曰常同輯

晉安林世吉天迪訂定

宰相部七

賀壽

賀張丞相壽啓

以下在朝稱賀

宋張正巳

五百年而名世有開合德之符八千歲以為春願罄  
大年之祝紛賀僚於大府錫備物於公朝四海傾心  
一詞贊喜恭惟閣下稟天地中和之氣膺聖賢亨泰  
之期名在圖書夙號中興之佐志安社稷獨成不世



之功援斯民於水火塗炭之深登太平於禮樂文明之盛壽域亘八荒之表金城爲萬世之安方國家卜世于無疆宜福祿自天之未艾慶傳袞舄封誓山河釀滄海之水不足以飲公之勲汗南山之竹不足以紀公之德階符同耀拱宸極以常尊神岳比崇鎮坤輿而益固未隆國壽共對天休其猥以么微久叨鈞播望公孫之賓閣莫厠下僚歌史克之頌詩第頌善祝

賀張右相壽啓

原作參政

宋楊萬里

日逢弧矢年迓松椿有是君有是臣稟爲千齡之盛旦俾爾昌俾爾艾長觀八月之清秋樂事駢闐歡聲環匝恭惟某官儲精嵩嶽毓秀茗川碩畫元勲久增光於政府沈機深識獨軫念於邊庭雖一時議論之靡諧奈百世聲名之益壯雲霾旣掃日月方明爰誕告於治朝以寵還於書殿獨茲均佚共以爲疑與其抱高明之節而枕石漱流豈若舒久鬱之才而興雲出雨亟符夢燕入相袞龍發舒未究之才猷揚厲無前之勲業其比聞袞渥聊雅慶緘犯顏宜掇于深辜藏疾已欽于雅度報章下逮餽禮有加坐令山房岑絕之區如得洞府珍竒之玩有懷銘刻無語發揚屬

逢誕日之臨敬拜長年之祝捧觴稱壽雖不陪賓客  
之塵舐鼎竊丹冀得與神仙之侶

代賀相公壽啓

明董應舉

大業熙天贊一人于久道上靈躋岳調四運于泰和  
惟元老之昌祺見帝心之純佑路公之驚遠使宋以  
榮懷郭令之歷中書唐其用又豈獨其人之年德將  
與其國以尊安福之所生世以爲寵恭惟閣下天人  
際會社稷爲身念腹心手足之誼甚深終無心於暴  
跡持消息保明之道於國獨殫力於旋乾故能坯冶  
一陶簫勺群慝下通上格竝然處天下之所難救變  
靖氓晏然釋生人之所患玄功善貸與世爲春至德  
不傷偕時於壽蓋當五老告符之日已獨縱於東皇

且觀三台平拱之辰固聯輝於南極業出緒餘於天  
下永葆真氣於環中是綿萬曆之禎祥長副九重之  
簡眷某等備蒙燕及遙切鴻私周雅基光喜齊聲于  
樂只天壽平格願追美于保衡不腆一介之塵聊代  
蒼生而祝

代賀嚴相公壽啓

明徐渭

門弧懸月儼依賜勝之圖卮酒流霞滿逗傳楫之液  
年年此節在在回陽恭惟閣下河岳儲精鳳麟叶瑞  
生緣吉夢盛傳孔釋之徵出遇明時綽有皐夔之望  
歷幾遷而入相同一德以格天四海具瞻萬邦爲憲

維茲華誕爰屬首春八袞初躋同尚父遇君之日一  
年以長多潞公結社之時莫莢微舒已含元氣交千  
更始載歷二旬兼齒德爵而全之天爲獨厚積歲月  
時而值此人所希逢知我此於生我益徵古語之非  
虛感恩圖以報恩其奈昊天之恩極伏願保固台嚴  
膺綏福履年高德邵永調伊傅之鹽梅主聖臣賢遠  
邁喬松之呼吸就安車以應召賜几杖而乞言壽考  
百年詎止武公之睿聖弼亮四世永作康王之父師

賀江陵相公壽啓

午日  
誕辰

明方逢時

五百應昌期天地啓文明之盛三千弘景運乾坤逢

壽域之開寶曆肇膺於聖人玉鉉允登於元宰恭惟  
閣下秀鍾江漢挺然名世之資祥毓荆衡卓爾字先  
之德青宮論道黃閣調元嘉績多于先王周室見畢  
公之敬保文命敷于四海虞廷仰伯禹之祇承惟一  
德之既咸斯百福之攸錫時當初度代際重熙景星  
耀彩於南躔瑞日迴輪於北陸葵榴燦而清和轉候  
蒲艾秀而朱夏屆期帝眷共天休滋至賞心與樂事  
偕并鱗繡麟章三世彩衣有爛蘭芽桂茁百年家慶  
無疆珍賜來自上方榮渥金莖之露歡聲騰于夷裔  
同依玉燭之光某職列封疆身羈屏翰稱觴燕喜愧

不逮于群公奉幣駿奔敢以厯乎驛使伏願如日如  
月如松栢三壽作朋而耆而老而期願百祿是總

賀張江陵相公壽啓

明方逢時

聖主垂衣千載際昌熙之盛元臣補袞三朝仰丞弼  
之休雲龍風虎乃天運之攸關舟楫鹽梅斯人文之  
肇協恭惟閣下挺名世之資貞值五百貞元之會蘊經  
邦之學窮三千禮樂之源秉一德以交修總百官而  
咸戒保又克勤于王室簡在益篤乎帝心備百順而  
履三台位與德而俱晉輔一德而歛五福道與時而  
允升誠所謂平格格天上壽壽國匪徒一人之有慶

而實兆民所求賴者也某職司疆域身藉旃幪望紫  
氣之氤氳三關地遠仰黃扉之峻極八柱天高敢修  
奉幣之儀式效稱觴之敬伏祈涵鑒慰此蠲禋

代賀江陵相公壽啓

午日 誕辰

明徐常吉

秉軸閱多年首翊靈長之運懸弧逢令節躬膺昌熾  
之禧祥輝近映于北辰壽曜高熒于南極百僚動色  
萬國騰聲恭惟閣下衡嶽鍾英郢都擅傑起詞林以  
躋綸閣顯然鉅碩儒臣扶穆廟而衛今皇卓爾精忠  
宰相謀周桑土姬公且端可同堂力措泰山韓稚圭  
亦當退舍靜恬者蒙將息隨波競捷之狂讒佞者被

懲舒負世獨醒之鬱施覃海內既推五福于兆民誕  
屬天中方啓千齡于一日乘龍鏡鑄成之暇納兕觥  
稱祝之歡絃協薰風帝迴永日色絲絲縷式彰續命  
嘉徵温水香泉聿應辟時吉象况賢子列簪紳以繞  
膝盛踰九子粽之粘惟善神迎劔履而從心慶溢百  
神符之著盖玄穹純佑欲召辰來有憑依故朱夏篤  
生令執衡巧相會遇時開世道事係邦基固迥殊田  
氏之僅足興宗亦非若胡公之祗能諧俗某托綠桃  
李奔役萍蓬外甸暫縈未獲展隆師之禮中台遙望  
殆如隨賀客之班對蒲酒而觴華筵蟻慕之衷情轉

切奉燕函以通素烟蛙鳴之韻語畧宣

代賀呂豫所相公壽啓

明

火鍾應律煥新令於仲春蓬矢懸門臨覽揆之初度  
祥皇南極彩映上台樂事駢闐歡聲環匝恭惟閣下  
堪輿間氣社稷元勳系出荆南九曾紉夫蘭佩名高  
粵右一枝獨擢乎桂林魁甲第以傳臚雲開五色載  
副車而叶上天授六韜游登鼎鼐之班益茂彝常之  
業細旃廣廈緝聖學於光明摺笏垂紳奠皇圖而鞏  
固泰階平六符正手轉鴻鈞玉燭調四時和身開壽  
域維春至中和之令節正岳生申甫之昌期當年參

政黑頭衆推雅量今日詢謀黃髮國有老成錫純嘏  
而三壽作朋慶良弼則百官承式五百歲名世者出  
誰舍我哉億萬年敬天之休公其予以慶闕宗廟喜  
溢簪纓矧在春知彌深欣躍東海賜履願開呂姓之  
封南山有臺載續周人之誦敷宜莫罄省覽爲榮

賀申相公壽啓

明潘季馴

台堦朗耀勳猷丕振於華夷壽域弘開籌算益增於  
海屋莫遂拜瞻之悃肅將頌祝之忱恭惟台座德邁  
樊侯學精倚相薇垣宣曜應五百年之昌期嵩嶽儲  
靈翊千萬載之景運秉一忠而翼翼之小心匪懈彌



三世而恢恢之大節彌隆惟茲誕日懸弧之辰正值  
秋月揚輝之候維皇惠我社稷助成有道之長主上  
富於春秋當共無疆之慶台躔與壽星而並麗祥光  
偕福祉以俱崇集鸞掖之仙班齊唱千秋之調分鳳  
池之甘醴預開五日之觴百福申之自天豐穰絡繹  
萬寶錫之於帝璀璨陸離某職守南淮心懸北極想  
冠裳之盛會未慰趨蹌塵山斗之具瞻徒深延企望  
蓬萊而布席祈同遐算于岡陵引二瀆以爲樽願篤  
純禧于溟渤仰希台鑒俯亮芹衷

代賀申相公壽啓

明瞿元思

昆蟲草木共慶長春元首股肱並生良月遭逢今日  
進門墻桃李一林想像他年看廊廟壺觴四海諸侯  
執玉帛至祝聖人壽卽獻棗於阿衛萬國拜冕旒歸  
出天子廷卽開罇于政府賀攸久所以成物頌我明  
王歌壽考遐不作人賴茲良彌真文章大司命爲宇  
宙大宗師召大保丕冒海隅快覩耆造德降趙中書  
匡扶社稷行觀久道化成

代賀申相公壽啓

明余鍾英

運協禎符五百年而生賢聖天開壽域八千歲以爲  
春秋當璇霄獻歲曜之期正崧嶽誕甫申之會朝班

豫動率壤歡同恭惟師相閣下卓越天才高華斗望  
逾弱冠而魁元聯捷姓名居多士之先方青年而台  
輔峻登德望竄三公之右爰立作相旋秉政機日月  
亭午而無旁陰治非小補天地既交而成泰道世升  
大猷是爲杜石之元臣宜享海天之長算茲者三秋  
布令萬寶告成律吹南呂之和日曜壽星之次金風  
收溽暑人意始平玉露湛嘉禾歲功已見况越中秋  
之昱旦天氣應而人事修更逢聖作之前期股肱起  
而元首喜良彌賚之帝實惟此時平格壽於天乃其  
初度雨暘時若堂岬交孚茲方鼎盛于春秋宜來懋

膺乎繁祉瞻龍光之在望卜鶴算於無疆某謬膺留  
後之權懼貽餐素祇奉廟堂之畫願勿替刑遥仰弧  
懸不勝雀躍雲開華蓋喜觀不老之祥日炫霞杯敬  
進長生之酒多富多壽多男子竊擬祝于華封如山  
如阜如岡陵載賡歌于天保

代賀張鳳盤相公壽啓

明唐文燦

恭惟相公閣下應運篤生既萃乾坤之間氣隨時匡  
濟方標社稷之殊勲旋斗柄而元氣頓回協薰絃而  
和聲交動傳巖再出連朝霈救旱甘霖溫國一留率  
土霑止焚德水茲誕辰之攸屆適建午之聿逢殿閣

日長納恢胎於大夏階庭露湛通潤脉於高穹離明  
之景象有徵豫順之祥禧無量惟老師垂紳提衽躬  
平格以迓遐齡乃令嗣綴珮承歡踵熾昌而延後祿  
赫赫然家邦並盛綿綿乎祚胤俱長某遙慕上台近  
依南極頌五百年之名世永陪王佐於瑤編祈八千  
歲之爲春直等神仙於金籙

代賀蒲州相公壽啓

明唐文燦

恭惟閣下產虞坂而聯傳巖人傑因地靈挺出鍾威  
陽而度華旦脩能與內美俱彰早冠藝林遡參政府  
風標如玉符夢燕之吉占雲翥耒銀起焚魚之高臥  
不競不練以運軸和平之福弘敷無偏無黨而持衡  
正大之情畢達曲江守素常呈物鑑于千秋文定披  
丹雅贊王猷于十策茲當建午適會生申宇宙播恢  
台錫羨方俾昌而俾熾乾坤開壽域承庥益偕阜而  
偕安且連元宰降嶽之旬見同寅協恭布列臯夔之  
穆穆兼值長君登朝之候知保世滋大嗣興尹姑之  
繩繩禎祥事並集相家德壽星交環帝座允矣一時  
之盛際翕然六合之欣逢凡親炙廷臣競叩龍門以  
展賀獨逖離部使徒瞻鳳閣而馳思雖難獻北海之  
樽尚得傳南山之頌在今旣作黑頭公調元未艾過

此更成黃髮老行祚彌長

賀許閣下壽啓

明王用汲

恭惟道際昌辰慶延華誕精忠懸日月結萬壽聖主  
之深知鉅業邁旂常端百代老臣之遐軌茲者清商  
從律靈曜輝躔桂萼拂天風香分玉鼎槐陰連地軸  
瑞藹彤墀萬國方祝釐于聖明三壽卽作朋于元老  
明良倡和喜起後先嵩岳秋高淑氣協周天之紀台  
垣雲護玄禧開景運之徵况貞元之會方新而乾坤  
之交斯泰許謨造膝普天仰洪庇以含嬉大化秉鈞  
率土占有年而作頌某遠棲山澤叨廁門牆詎意蹇

厄之踪復荷甄掄之賜苟可效駑駘於下櫪不憚時  
嶇安可負期約於初心貽羞冰鑑伏冀順時崇播爲  
國燮和弘相業而接臯夔甲子四百年循環伊始翊  
聖鼎而軼三五春秋八千歲駐世同長

賀許相國啓

明余鍾英

泰階呈瑞高陽秀毓上台壽域開祥佳氣光騰南極  
龍宸錫美鶴算延禧恭惟閣下德重珪璋才優鼎鼐  
代言禁闥欽頒九陛絲綸秉札石渠總領三朝制作  
青宮毓德華表揭先學後臣寶幄橫經御翰煥爲舟  
作楫朝野倚王曾正色兒童識君實大名年際載千

宜文公之復出日臨重六逢彭祖之誕生紫垣星燦  
式當花甲一週赤舄雲籠咸頌椿齡九若某濫刑柳  
署托興萊台祝多封人之三歌益君子之萬壽身兼  
壽國依宸極以常尊元老懋元勳贊基圖而永固

賀王相公壽啓

明馮琦

帝賚良臣懋著燮調之效皇揆初度式昭平格之徵  
遙瞻衮衣赤舄之光近逢蓬矢桑弧之日輝騰南極  
慶集元樞肆大呂紀玄冬橐籥啓三陽之泰惟上台  
居黃閣絲綸回四海之春蓋國有二公惟人乃備而  
天之五福得全者昌某秩列抱關情深賀履五百里  
而稱畿甸幸依槐棘之陰八千歲以爲春秋  
椿之壽壽命長矣芾祿康矣百僚矢召奭之音元首  
明哉股肱良哉千載履臯陶之什

賀陳玉壘相公壽啓

十二月十三日誕辰明馮時可

玉燭調和歲成建丑之月玄英薦祉國慶生申之年  
岳降詩歌星迴律紀恭惟閣下幽思達化麗藻揆天  
千年井絡之精會昌建福累世韋門之業繼武揚聲  
玉柱瑯函獻納總稽前古黃扉金斗訝謨歲叶大猷  
清時逢小歲之辰慶事直長秋之誕揆留皇鑒五十  
始滿而初踰夢錫帝齡百年正中而未艾筵開膺八

之後欣瞻莫莢十三會舉元正之前仰羨冥鴻上六  
人皆重夫黃髮主甚眷乎丹衷飛睿製而翰染宮雲  
賜金蓮而光分卿月碧鏤脂唇之澤香並龍涎銀合  
注顏之膏美加馬乳上台氣色夜夜傍紫宸而常明  
左掖韶光歲歲映金莖而無改竊念菲劣久辱甄陶  
錦水雙流朝宗之情甚切玉山重阻仰止之念彌殷  
謹肅荒函聊申私臆伏願八柱補鰲極之天八方常  
開壽域一手修娥池之月一氣屢轉鴻鈞

賀王相公壽啓

明王演疇

四時之運悉貫于元五福之祥光徵于壽共喜千齡  
之華旦喜逢三月之韶光天篤昌辰人膺熙祉恭惟  
臺下琮璜清潤鍾呂冲和鬱爲稀世之珍珠磨鉉軸  
標起清時之運都俞明良乃鬯鴻猷式崇駿業攬槍  
芒滅東清蛟鱷之波烽燧煙銷西掃豺狼之穴旣孕  
星精而鍾玄化遂夷天步以壽黎元有是君有是臣  
允邁千秋之會俾之昌俾之熾眞當五百之期某置  
品籠中抗旌徼外徒懷冬日豈無寸草之誠欲報春  
暉但有萬年之祝悵遠階序奚取儀文志欲凌風那  
得變籀而化鳥恩如覆露倘從舐鼎以得仙

賀張洪陽相公壽啓

正月初十日  
誕辰

明馮時可

東皇鑰啓瑞氣霽于旬初太皞規移融風動于弦後  
當此迎陽之際適舉介壽之觴赤舄生輝黃樞動色  
恭惟閣下學窺衆妙治贊一貞豫章之虬幹參霄蟬  
蛸難撼豐城之龍光犯斗璫珥不干發讜論于先朝  
九有風雷號號明正學于近世諸家燿火卑卑坐爨  
洪鑪散作陽和萬里立扶大斗掃除塵霧四陲皇覽  
初揆國誦無疆之福帝祉方茂朝瞻不老之容說壽  
筵于螭頭雲飛三素薦春盤于鶴禁香動五辛綵燕  
宮裁效青書于典午鮮龍御饌詫奇事于司空切玉  
署而香浮一枝梅綻傍金莖而秀發十葉萸開某久

荷甄陶近承顧盼心飛小苑脉脉新波目斷長楊依  
依曉樹謹修獻壽之敬聊摠化鵠之衷伏願常爲帝  
者之師一編黃石永作黃圖之鑒數語丹書

賀趙潑陽相公壽啓

明連繼芳

上柱擎霄千載應地天之泰中台傍日三春漆海屋  
之籌運屬休期祥開彌月恭惟閣下人符三代名唱  
五雲紘軸在其仔肩九陞清晏霖雨惟其運掌萬里  
陽和試觀之椿欣欣而向榮又觀之桃夭夭而正灼  
江山麗人以遲日斗柄於天爲建辰蓋天生社稷臣  
帝師王佐天資良弼壽南極西庚累洽樞衡卿相共

推元老煢煌德業姬孔應是前身泰階平蒼生多絳  
人甲子壽域啓黃閣有莊氏春秋某身繫匏瓜心懸  
華岱繪函谷關中之子獻蓬萊閣上之仙所願以鹽  
梅舟楫爲春臺勲在則人其斯在以堯舜君民爲壽  
域名存則身亦俱存玉燭之日月偏長松筠不老金  
甌之乾坤無極槐蔭長垂

賀沈相國壽啓

明連繼芳

五百餘年丁名世來注金甌萬有千歲祝耆英常調  
玉鼎遙阻燕賀敬托魚傳恭惟閣下瑞映西河清含  
一室銅龍承幾命正禮樂于三朝白虎與諸

童于八代喜元臣同宗並駕蛟龍會天上風雲合三  
老一日聯升豫越起山中宰相百齡天錫七袞口增  
九醞滴金鬢再見瑤池醉色八珍羅鳳髓重瞻玄圃  
仙姿金門看紫氣常浮黃閣與絳霄共處鹽梅麩藥  
帝資元氣以調元日月岡陵人祝世臣而維世某五  
雲回首遙開壽域八荒千里馳神長繞沙堤一路

代賀相公壽啓

明馮琦

茲者朱明當令蒼紱屆辰比上壽於南山欣陽德之  
居大夏懸孤忠於北斗仰正人之在朝廷兩社關其  
重輕百僚在其陶鑄蓋惟昌明大有道之世乃生耆



碩不二心之臣得全全昌上天篤其純嘏景行行止  
下土奉為儀刑豈但吾黨錫光抑亦朝紳鳴豫某謬  
以葭莩之末比於槐棘之陰仰荷提携游蒙叙進祇  
膺新命頓復舊階量逾飲河遂有歸休之請恩同酌  
海其如報稱之難敬托魚箋恭伸燕賀中書再考益  
高麟閣之勲奕世三公終合鸚堂之兆

代賀相公壽啓

明謝肇淛

玉柱承天羨和鼎鉉綿萬曆金鑿捧日齡齊海嶽慶  
千秋瑞靄西池輝騰北斗八方共域四履同歡恭惟  
某官禹穴鍾英雷門薦祉格天一德新看十里沙堤  
遇主三朝竚見萬年玉燭惟茲建申之月適當生甫  
之期大火初流鼎裏丹砂湧出金風始至雲中青鳥  
飛來盖天啓聖明五百年必有名世故地轉佛子八  
千歲以為春秋瓊芝共寶稼同登玉液與金波競爽  
何緣末品邁此芳辰踪遠鷓行遙憶霓裳于北極魄  
搖螭閣莫勝雀舞于南山敢託尺緘聊抒寸悵情殊  
切乎三願祝竊附于九如左掖光芒耀金莖歲歲無  
改上台氣色依紫禁夜夜常輝純嘏凝禧永補袞龍  
之化大齊登算時瞻馭鶴之仙

賀申長洲壽啓

明張佳胤

右集卷四  
玉柱承天萬國繫絲綸之重金鑿捧日千秋齊海岳  
之齡壽域弘開頌聲交溢恭惟閣下一德格天三朝  
遇主彤墀首唱摛辭垂琬琰之章紫閣崇登熙載茂  
旂常之績調和玉燭五風十雨若時鞏固瑤圖九夷  
八蠻通道茲當少昊御辰中元屆節九重將欲誕聖  
三吳遂爾生申公誕辰先  
聖上一日蓋天地交而方泰故明良  
出自應期伏願佐一人以有慶永三壽而作朋劔履  
近星躔常映麒麟之閣聲名垂日月頻添蓬島之籌  
益摠補袞嘉猷永替垂衣盛世

賀申長洲壽啓

明李言恭

洛邑貞休王舉功宗之典歲星呈瑞天壽平格之賢  
蔭祚彌長帑笥載錫欣然有喜色皆慶瞻柱石之  
勳蕩蕩乎無能名咸願益海天之筭恭惟閣下心涵  
天象應壽星耀日之符氣稟地靈際崧嶽生申之會  
望寶隆乎時棟德可裕於後崑黼黻皇猷類仲山之  
補袞陶鎔君德若傳岩之礪金譽洽百年功昭六合  
邇乃經營底績落成方著於慈宮是用金幣覃恩渙  
渥更延于秘舍既申錫以繁祉宜永享乎遐齡茲以  
令布仲秋律吹南呂方越中秋之翼旦正天人鼎盛  
之時况逢聖作之昌期尤君相泰交之會五百年而

生賢聖惟此其然八千歲以爲春秋自今伊始瞻龍  
鍾之在望喜天開不老之祥卜鶴筭以無疆願日進  
長生之酒其長無尺寸幸根闌之任不遺器本錙銖  
但襪線之才是取猥司南服忝守金陵適仰弧懸更  
羨休徵之畢聚不勝雀躍敢申賀慶之微忱僉曰得  
位得祿得其名不啻於今而爲烈尤願多福多壽多  
男子直將與國而咸休無斃頌思統祈鑒在

賀申相公壽啓

明周獻臣

鴻樞紀誕環海嶽於休徵麟紱縹期鬯風雲於玄感  
五百年名世適開昌曆之期八千歲爲秋願慶大年  
之祝歡騰龍尾祥溢鳳池恭惟某官震澤含精靈符  
蘊闕帝寢賚而得說列緯述精嶽誕降而生申六符  
應錄冠冕彤雲之代日御寅賓羽儀玄鸞之朝星迴  
緹管軒臺聳構叶璿紀而定三辰舜日薰和握斗儀  
而齊七統帝圖開道亭毒二儀皇猷格天混融列瀆  
夷王度於四極丹裔同文恢天網於八紘青徼止武  
三朝宿老對萬年而敬休一德宗臣躋八方而同域  
瑰勲瑋命選項方虞維茲上鉉開祥左弧紀瑞帝大  
皞司天商秋涉仲神蓐收執極佳月臨箕萁階抽潤  
南呂愜太階之平桂城騰馭西崑紀涼年之序乾坤

之筴百二十際歲宿之端辰春秋之歲萬六千開甲  
齡之初度傳柑天上珍厨餘玉鼎之芬唾核人間木  
帝叶金門之慶鬱元精之間氣繫宗社之休期某庇  
席鴻庥驅趨下服辰階闕展歡聞華祝之新期箕緯  
占符虛緬翹材之舊夢景崑瞻之在望頌川祉之深  
增琅軸琳緗誰摹寫三皇之誥金根紫腦並垂涎列  
會之筵所願玄化妙幹於手陶功苞瓊尚昊貺逾綏  
於眉壽慶衍喬松廣成千百年鬯仙風而迴坤軸中  
書廿四考扶靈壽而拄乾維

賀許相公壽啓

明余鍾英

河圖呈象重六畫而爲坤洛書衍疇九五福而曰壽  
是惟順承之地道允稱平格之王臣率壤具瞻同朝  
甚喜恭惟某官氣稟黃山之間值道續紫陽之真傳  
貫串古今千數百年運之掌上轆轤宇宙二十八宿  
羅於胸中天挺人豪生應坤爻之六帝賚良弼位聯  
台座之三時惟夏季之期序屬宣明之候六陽全盛  
生萬物而光輝衆寶告成開八荒之壽域日躔鶉火  
天值嘉辰律應林鍾人歌旁午五百年而生名世惟  
此其然八千歲以爲春秋自今伊始於惟繁祉宜錫  
元臣其辱出師墻遙瞻相館觀海籌之添一諒臻純

嘏之長效嵩嶽以呼三式獻熾昌之詠於鑠壽豈未央頌言

代賀張蒲州壽啓

明李鼎

寶鼎凝圖參紫極而三台日近玉書吐燄開黃道而五嶽天齊業永千秋功成四序虞庭慶洽楚甸歡騰洪惟相公朝端元老天際真人近堯舜之居若此其甚續臯夔之績如彼其隆貯九丘八索于胸中洪鍾待叩覽六合九垓于眼底金鏡高懸棘院持衡盡網中原之麟鳳蘭堂秉筆森羅太乙之星辰衍堯曆于萬年人躋壽域擁軒輿于億載道洽熙朝迺製賓紀序之辰正申伯誕生之節日長似歲壽永如天簾形雲冷浸琅玕之簾筵開紫閣光浮琥珀之杯西極星躔煥龍文之五色東溟霧靄添鶴筭之千齡某身繫一官魂搖八極酌章江之玄醴滿泛千觴對匡阜之香爐遙稱三祝

賀申相公壽啓

明唐文燦

玄穹回泰運調元之相業方隆紫閣納豐禧駐景之仙齡斯永瑞呈南極光映北辰恭惟某官擅乾坤之瑞氣凝柱石之奇標長培國脉于和平普濟民生于富壽斗杓既臨建酉弧矢遂報生申聖節開先詰旦

倡高呼於殿陛賢科振後屆期綵萊舞於階庭盖有  
君必有臣允協雲龍之昌會惟是父兼是子彌綿臯  
鶴之和聲洋洋乎慶洽家邦焯焯然盛超臺省某榜  
名濫綴慚附驥之難追臬職虛縻悵獻羔之莫遂恭  
授荒筴於下走冒通陋篚於中消俯展塵懷仰承嶽  
誕五百年名世佇觀積勲闕以勒鼎鍾八千歲為秋  
且卜完真詮而登圖錄

賀沈蛟門相公壽啓

明連繼芳

弼賚良於帝崛起商霖嶽峻極於天誕生周翰海上  
聞鵬羽翼人間見鶴儀刑恭惟某官宗匠文章阿衡  
相烈索震主器鞏泰山於四維以人事君升鉉路  
三益當三十年必世之運逢五百載王佐之與公之  
生兮天下為思名世公之壽也朝廷更戀老臣河洛  
毓其精神尼山標其骨骼人皆重乎黃髮共賀萬曆  
之臯夔主獨眷乎丹衷永佐大明之堯舜某仰斗心  
懸觀風跡繫覬石麟於天上僭繪函谷之牛阻銅狄  
於朝中載頌高岡之鳳伏願玉筴常新金甌彌固子  
云大德必壽詩歌君子萬年燮陰燮陽椿榮豈比人  
間之卉補裳補袞蓬島常延天下之春

代賀張江陵壽啓

明李鼎

金鉉調元九鼎奠輿圖而永鎮王樞幹運八荒開壽域以無疆丁名世五百餘年祝君子萬有千歲歡騰逖邇慶洽明良洪惟相公閣下孔席真儒堯堂碩輔弘大人格心之理允矣帝師擴天民先覺之懷居然聖相雉來九譯知周海之無波鳳舞兩階識舜庭之有道挽流風於純嘏律起黃鍾翼景運於靈長功參玄極天倚三公爲北斗乾轉坤旋人歌萬壽似南山川增日盛至文潞加恩之日正宣尼攝相之年龍光遶室而五色呈祥鼇足擎天而千秋益算賜冰清粹涼徹龍皮法饌盈盤甘分麟脯舞鳳雛於黃閣官銘連雲齊鶴馭於紫宸瑤觴浮月千百代共仰遐齡億兆人欣傳盛事某濫巾遠服望履層霄紫霧散香爐光浮五嶽清輝涵石鏡色近三台頌麥丘而頂踵知恩企蓬壺而愷情醉德

賀申相公壽啓

明支大綸

聖祚中興瑞應星躔之會啓元翊運光聯南極之芒亶明良五百之期協魚水一堂之盛祥敷誕宇喜徧珩珂恭惟某官道膺天壽學爲帝師正事格心兼輔弼凝丞而訓德紆紛鎮摅集規隨明斷以宣猷玉燭調而百穀屢登泰符集而九垓息警時維八月序屬

中秋壽域弘開正寶曆萬年之象相門清晏又瑤圖  
一德之期扶堯德之雍容長占蓬瀛清晝建姬勲于  
悠久饒弘禁苑芳春蓋不特坤岳比崇鎮黃扉而永  
固行見陰陽祗燮拱宸極以常尊某南海樗材西江  
俗吏名慚蠅附徒懷獻履之忱迹阻鳧趨莫效放生  
之祝念茲晨灼灼麟服絢鶴筭以增輝願自今翩翩  
鳳儀翊虹祥而永慶山高川至弘庇民福國之猷聖  
主賢臣均壽考雍容之慶薄言申賀厚冀丙融

代賀山陰王相公壽啓

明姜夔

南斗開尊挾飛龍而醉呂西門摘果駮翥鶴以宴王  
一朝飲徧乎上池百歲驚傳乎盛事恭惟某官三晉  
儒標兩朝人表調和王鉉備麴蘖與鹽梅鼓鑄金衡  
暢春風而化雨奕奕周官二輔休休秦誓一人維茲  
物景嘉平見蓬弧之載試年光初度看欄彩以娉娉  
承歡膝下兩行魁名雙美舉爵筵前百年冠蓋層來  
孔雀屏開共羨鉅家風範伏鷗香裊爭誇大府豪華  
黑頭宰相幾何青眼故人十載唯是一官匏繫周章  
漢邪之郊千里蒿思寤寐雲霄之境爰摛燕啓用展  
芹私所願疆飭合和贊休明於匪替儲精旣本襄棊  
威以無虞



壽林下  
賀徐存翁相公壽啓  
恭惟天人協助年德爾隆大冶之金成色更精於百  
煉明時之鳳鳴聲遠徹於高岡莫止裴公快綠野之  
優游實乃司馬繫蒼生之仰望寒潭秋水照孤月以  
明心蒼狗白衣咲浮雲之過眼某駑駘弱質樗櫟散  
材蒙收骨於駿駒遂並生於桃李此身何幸喜同地  
以同時矢志靡他竊共憂而共樂茲當申甫之降誕  
殊深山斗之傾誠擬拜門墻偶羈婚娶之冗遙瞻賓  
客未伸祝頌之私聊具下情仰祈高鑒

壽林下

賀徐存翁相公壽啓

明萬士和

恭惟天人協助年德爾隆大冶之金成色更精於百  
煉明時之鳳鳴聲遠徹於高岡莫止裴公快綠野之  
優游實乃司馬繫蒼生之仰望寒潭秋水照孤月以  
明心蒼狗白衣咲浮雲之過眼某駑駘弱質樗櫟散  
材蒙收骨於駿駒遂並生於桃李此身何幸喜同地  
以同時矢志靡他竊共憂而共樂茲當申甫之降誕  
殊深山斗之傾誠擬拜門墻偶羈婚娶之冗遙瞻賓  
客未伸祝頌之私聊具下情仰祈高鑒

賀呂期翁壽啓

時詔賜存問

明余有丁

星臨南極藹紫氣於幾衡序屬朱明來薰風于殿閣  
光騰梓里詔出楓宸恭惟相公閣下靈會鑑湖神符  
稽嶺三十年佐皇王之業登海宇于太和二十載懸  
故里之車綿詩書於世胤帝心簡在何啻一夔之承  
堯相道已成遂效二疏之去漢謝黃扉於上國開綠  
野於東溟皓首居鄉江湖雖遠丹心對日魏闕常懸  
茲者爰加文錦之頒特荷温綸之寵採仙芝於越嶠  
敞壽宴於蟠桃雪刺滿頭文潞公之精神倍爽霜毫  
生額謝安石之強力猶新八音齊鳴簫鼓接天台之

路九賓成集冠裳映赤城之霞玉帶與白晳並輝麟  
服共青瞳爭焰簪纓繞公膝下孫曾盡瑣闥之英觴  
豆獻爾堂前几席總雲霄之侶某千里緘辭慚非驥  
足一行作吏幸厠牛溲周家之渭水未移申叟之蒲  
輪將駕繫官冀北莫趨元輔以依歸遙望日南咸指  
大椿而祝頌

上呂太師相啓

明羅萬化

聖世辭榮共羨山中宰相天庥問老競攀河上仙翁  
重毗輔於先皇付勲名于後進朝虛端揆社合耆英  
恭惟閣下文壁儲精扶輿毓秀編摩載筆蚤基譽於

玉堂啓沃格心素蜚聲於彤陛公孤再陟簡在一人  
自疏慨于居廬三徑秋容自適方壽綏于履舄九重  
渥命彌溫咸稱三達之尊正屆八旬之誕矧屬尚父  
載車之遇更祈文潞再相之年隨地著先憂身江湖  
而心懸廊廟有園開獨樂侶琴書而樂並巢由如某  
者梓里微鱗木天庶品遙瞻舜水冀趨步于槐堂翹  
望堯山願靈長于蓬海

賀殷棠軒相公壽啓

明于慎行

節臨上巳東皇開七帙之辰日麗初躔南極映三台  
之座松椿馳祝燕雀翩歡恭惟老師閣下熙朝哲傳  
命代大儒成一德以格天舊捧虞淵之日協三公而  
論道早爲商野之霖碩畫精忠以天下爲已任陰功  
隱惠利國家無不爲兩朝垂耆德之勲千載見真儒  
之效長庚大昴五百載以膺期旭日卿雲六十年而  
復旦仰泰山而比壽况茲逢降嶽之辰挹滄海以添  
籌何止效如川之誦祥雲縹緲紫呈芝草之盈田香  
靄龍葱紅見蟠桃之照地汎蓮舟而披葦笈恍疑地  
上之群仙列珠履而挹瓊漿共祝山中之上相某夙  
緣樛櫟誤荷菲葑放迹青山阻遠潭潭之府馳心綠  
野莫趨兩兩之階肅拜魚槭仰通麟閣伏惟電鑒不

任永兢

賀申殿學壽啓

明焦 竑

寵辭上宰歸榮故鄉當俯月之嘉辰舉懸弧之勝會  
 貴極富溢而無亢滿之累名遂身退而襲壽愷之祥  
 在於庇休孰不慶抃恭惟閣下元精發秀冲氣鍾和  
 早射策於楓宸薦升華於袞路清規亮節應五百歲  
 之聖時緯武經文垂十四年之相業片語定群疑之  
 可否一身繫四海之安危逮辭寵利以弗居彌覺身  
 名之俱泰頃始開於七袞實豫兆於千齡輕霞迅商  
 會現老人於南極觀濤作賦更同交友於中秋開揮  
 漢殿之金叢對謝庭之玉在前輩或難於兼美惟哲  
 人適得其全昌斯為地上之仙奚啻山中之相宜永  
 延於椿算期再踐於槐庭恢張未竟之經綸揚厲無  
 前之事業躋斯世於仁壽致吾君於唐虞某樗櫟散  
 材門闕舊物鉅壘量溢愧久負於吹噓橐籥恩深詎  
 敢忘夫荷戴敬托魚書之咫尺稍抒燕賀之悃誠欣  
 躍之懷揆裁莫盡

賀申相公壽啓

明吳 椽

金樞建酉值嵩嶽降以生申玉管司辰喜陰陽調而  
 問丙享五疇而未艾慶叶鳳毛鏡四序於成功道潛

龍起恭惟相公閣下平成禹稷燮卞伊周王輔誕白  
星之精帝師授黃石之秘鴻臚唱籍奪標冠三百人  
之先鳳閣宣麻勒鼎超十六相之後鹽梅交濟無異  
傳說之與高宗耕偶同修實比姬旦之與召奭和衡  
旁化成章變於無爲治揭中興鄙刑名於不害一德  
既孚於主眷諸祥宜習於天休文章與事業交輝元  
魁晉陟元輔步武與貽謀並茂三公繼體三孤身厭  
承明暫辭鴛班槐閣志希招隱長嘯鳳侶蘇門桂吐  
如拳肩芳辰於八月棗來若瓠近聖節於萬年蓋大  
運值天地之交故應期起明良之會甫五旬而登鼎  
群僚羨黑頭之公未七十已懸車聖主恩赤心之藎  
雖丞相已斷掃門之客而舍人還候促裝之期某鉛  
槩書生銅童賦吏羨君子之立功立言立德建宇宙  
不朽之基祝聖人之多福多壽多男附華封無疆之  
祝伏願上台氣色夜夜傍紫極而常明世胄聲華代  
代卜金甌于永盛

賀王殿學壽啓

明焦 竑

五百年之名世有開合德之符八千歲以爲秋願上  
大年之祝門屏交慶朝野歸心恭惟閣下有伊訓說  
命之學兼房謀杜斷之長主上諒其至公血誠海內

推爲巨人長者爲蒼生而起勉酬作雨之求從赤松以遊遽抗浮雲之志心雖遊於澹泊身實佩乎安危九夷八蠻想整頓乾坤之手青天白日鑒扶持社稷之心駿功長勒於鼎彝鶴算定綿於箕翼坐閱熙明之盛事益垂平格之令名周拜前魯拜後邁韋平父子之榮陟格帝尹格天續堯舜君民之業永隆國壽共對天休某樛櫟散材門墻末品方一人修三老之問肇舉上儀慶八荒轉一氣之鈞爰陳善頌其爲領嚮未易揆裁

賀張新建相公壽啓

明謝廷諒

朝端碩德玉殿之劍履晨趨天際真人綺荐之笙歌春度功高捧日歡動祈年萬里稱觴五更執爵恭惟閣下鳳麟儀止龍馬精神昴宿鍾英陳嘉謨於帝室箕星炳耀賚良弼於宸軒崇雅懿而絀浮夸壽茲道胍進溫良而退刻薄貫彼宗維台曜燮和星奔拱北聖心感悟風起居東公論久自昭明流言倏隨波息天優元老逍遙泉石之間帝許耆英休沐神仙之宅洪厓淥水裊裊祥煙牛斗龍沙蔥蔥佳氣戴鶡冠而控赤鯉上下琴高扶鳩杖而馭斑麟迴翔松子授絳雪之簡香薦五明衣赤霜之袍核羅千歲光懸太

節近上元輝煌不夜之城瑞藹長春之府當年羊酒  
欵洽西隣此日鶯花飛鳴東閣草平相業昌華緒於  
公門游夏生徒迪芳規於帝闕絳帷春滿傍芝宇而  
接霞標丹陛雲馳跋蘭訊而眇天末塵奔冀北遙懷  
章水之濱彩徹孤南敬效華封之祝

賀呂相公壽啓

十一月

明王演疇

寒威雖烈不凋松栢之貞泰運方亨益藉棟樑之重  
禧迎麟紱慶協龍光恭惟臺下兩儀正氣三代元勳  
托景風雲度越三晉之彥調元鼎鼐儀刑百辟之模  
沃心盡獻嘉謀陳力更輸忠悃既一言而不合乃三  
宿而不留松菊陶情鶴算特隆於先烈箕裘紹美鴻  
禧更衍於後昆時值一陽且逢初度兩楹積素謝家  
之玉樹堪誇三殿鬪班曹相之寶裝宜整和鹽梅而  
調玉燭果然冬日舒暄嗟黍谷而固金甌倏爾春風  
報信方啓千齡於一旦佇推五福於八荒日麗恒岡  
朝野望三台之動天開壽域華夷祈百福之臨某久  
被光風私沾化雨片函宣意一介表心喜躍鸚鴻猛  
欲赴瑤臺而薦棗職羈枳棘未由泛瓊海而添籌

賀王對南相公壽啓

十一月三日

明王演疇

五曜光昭玉闕永古今正脉三台色動金甌符世運

昌期壽域日升福源川至。恭惟閣下神由嶽降精自  
昂分正色立朝勁節與冰霜並烈孤忠自許丹心偕  
日月爭光惓惓建本之謀獨抗中流砥柱懇懇回天  
之力每搜領下逆鱗誠大臣以道事君信君子見幾  
而作優游獨樂之園日涉成趣嘹唳鶴南之曲入耳  
爽心斗柄春回泰運方旋於一陽之候長庚宵燦願  
壽依始於三日之辰但白雲止宜暫臥黃花而赤膽  
豈容頓忘紫闥相中國之司馬膽落腥羶起江左之  
謝安望孳蒼赤某幸歲星之咫尺常夢寐於登龍奈  
虎壘之倥偬惟慙勤而祝鵠然屬詞此事不敢謾引  
仙葩藉物將誠姑且敬陳鼎實某不願公遽謝漢事  
於赤松惟望盡展虞謨於丹陛耳謹布下情仰祈崇  
鑒

賀申長洲壽啓 林下

明湯來聘

天祐皇家五百年而啓泰帝賚良弼八千歲以爲春  
身縮金童茂衍黃籙紫宮之祉腹吞玉象益延蒼松  
翠栢之年弧懸于秋色平分之明朝人月應團圓之  
會嶽降於聖人篤生之昨夜君相協先後之天色爛  
烟霞慶敷寰海恭惟某官列緯元精兩儀間氣毫端  
醲郁丹墀獨對三千胸內絲綸紫極快瞻九五芙蓉



應兆不虛神姆之言梅雪題詩果副元台之望龍樓  
鳳閣歷陳太平之謨衮衣繡裳躬覲天日之表直亮  
忠勤惟一二輩左右輔弼幾二十年碩畫蓋謀撫寧  
華夏陰功隱惠孚感神明堯舜御萬方正明日月阜  
夔宅百揆方際風雲乃睠桑梓故邦養高松筠舊徑  
百公怡綠野綿唐曆之偉伐永盟旂常留侯訪赤松  
定漢鼎之元勳尚垂帶礪故忠誠通三極人多羨君  
實之年而勲德亘八荒民猶望魏公之相龍光在壁  
共驚鱗袍玉帶之榮鶴表出塵畫祝壽山福海之慶  
某化育久沾于雨露文衡診任于南都欲持南豐一  
瓣之香遙致曾人二禱之頌伏願著蔡舊德降泰山  
太傅之名龜鶴喬齡應上極老人之瑞康寧壽考邁  
德於汾陽禮樂雍熙仰承於姬旦

賀太倉王相公壽啓

林下

明李國祥

昇峽午橋雲擁蒲輪日下弧輝丙野霞傾瓊醴秋分  
小同池上鳳毛難老里中龍種福崇百順壽永萬霜  
恭惟某官江左夷吾斗南仁傑瑩然水鏡指麾紅紫  
成章烟矣冰壺俯仰丘陵生韻代言玉署宣皇澤以  
洒春霖秉筆石渠典國謨而披藻景堂開綠野龍鍾  
晚重天津室接青雲鵠聳夙瞻江表不須伯始延年

之菊幾見沙淺蓬萊寧庸方朔曼倩之桃會看塵揚  
滄海清商始肅壽域弘開曲度蓼風吳趨共雲和飄  
縹筵張桂月宮錦同彩服流輝以元老而峻元勳頻  
乎環召且壽身而兼壽國邁矣袞歸洛水龍德若實  
知名紫塞東山鳳起謝安繫望蒼生某才短錫主心  
長望履盈盈衣帶之水脉脉華封之棕天老望三台  
仍捧星辰北極人寰出一佛同茂松栢南山

壽宰相父母

壽李少師太翁啓

明王家屏

畫錦紆榮九命錫元公之袞星弧紀瑞千秋奉大老  
之觴萃福祿壽考于一門合父子祖孫爲五世有秩  
斯祐不顯其光恭惟太翁肇基明德濬發長祥黃雀  
街環不負生全之報綠槐滋蔭久施封植之勤肆惟  
老師閣下一出應名世之昌期獨對成顯親之大孝  
金華論道闕敷黼黻之謨玉鉉調元參燮鹽梅之實  
師師濟濟率臣鄰德讓之風斷斷休休錫海宇和平  
之福巖廊功遂吧咕情殷九二利見大人已文明乎

天下五十而慕父母實純一之由袁安車陳歸國之儀命服曳趨庭之彩堂開綠野地卽丹丘玉帶金魚識山中之宰相木公金母行地上之神仙矧維嶽降之辰正值陽生之候影移蒼陸舒化日於奠階氣應黃鍾襲融風於蓬島爵齒德爲天下之達尊孝弟慈成一家之和氣壽筵載啓駝羹傳禁鼎之珍封綽累加鸞誥渙宸章之秘親以子貴及觀股肱元首之始終福與日新共羨齒髮精神如少健三千大千爲世普利其緣八十九十曰耄孰窮其算慶享朝野感絕古今如彼瑤池徒侈談而無驗方之洛社雖聚樂而未融某等識漸窺豹幸擬登龍自擇榻以來皆東帶而立四科徒設一莛無稱加乘雁渤澥之濱焉能爲有備群品參苓之末奚貴夫多然出揚公之門尚慕分庭之俎豆適袁氏之館頗聞奕世之弓裘吉日協靈恭憶蒼麟之綬華封效祝肅通青鳥之書儻與承筐如親撰杖伏願保合天倪凝承帝眷聰明而爲世先覺壽考以保我後生丹砂可化侍雙親白首之娛紫閣方虛念四海蒼生之望

壽張閣下太夫人啓

明王應選

元扉弼化明良際一德之光慈幄疑釐忠孝洽兩全

之美瞻程輪以就日喜溢含生仰鳳誥之自天道弘  
錫類寵膺紫極養就黃扉宗社奠安正捧魏公之日  
庭闈悅豫旋瞻狄相之雲躬上宰以承迎萬里識荆  
襄之重介中樞而祗迓九天宣日月之華玉佩仙琚  
共看婺光聯壽域青童白髮爭傳金母下瑤京都人  
士舉洽歡聲卿大夫俯領喜色兩京申眷殊儀行重  
於上方五位頒綸異數迥加於九錫霞駟奕奕冠輝  
簪八座之榮雲鼎煒煌亞玉食九州之貢大孝公  
顯親上忠資以報主奉慈聖而左右慈慶道廣年福  
壽之疇輔皇極以敷錫皇猷緩蕩乎正宜之理意萬  
邦而惟則昭千古之為光某謬綴班行仰勒知遇西  
來按節遙瞻相業之格天北嚮傾心祇誦孝思之永  
世敬裁竿牘贊喜門墻伏祈台鑒之昭垂莫罄思忠  
之欣躍

賀葉相公壽啓

明樊王家

代衛撫臺

身近一人匡弼獨高黃閣績書三載恩光特煥紫霄  
信是有君而有臣寧翅積日有積月慶均華夏榮溢  
冠紳恭惟某官國之柱石帝者股肱秀鍾閩海之靈  
建旗鼓於中原前無勅敵藉冠瀛洲之選校經書於  
秘閣道集大成壁水作人喜溢環橋觀聽璇宮晉列

忠存折檻箴規衆仰斗山望隆台鼎汝翼汝爲汝明  
 聽惟帝曰俞作舟作礪作鹽梅伊誰之力更值聞聲  
 稱聖年來靜攝居中無之同列引躬獨以賢勞當國  
 誰任鼎鑪之耳稱社稷臣孰通釜鬯之疑爲文武憲  
 真孤忠之捧日信一柱以擎天勛比及三年勛伐  
 已高千古固億萬千齡大曆寔在斯時登二十四考  
 中書厥惟伊始雖一命再命時循正父之墻而念茲  
 在茲請作召公之考斷斷兮無他技用保我子孫黎  
 民巍巍乎有成功永佐今天王明聖某西蜀唐流五  
 湖冗吏幾年望鎮空慚駐節江山此日新銜更愧談  
 兵樽俎寔邀重庇殊切景行司馬相而虜寢遠敬荷  
 洪恩於不宰姬旦輔而周卜曆願言與國以同休謹  
 將不腆之忱聊申莫助之愛五百年有名世請贊惟  
 明而惟良百千歲以爲春秋長祝壽民而壽國

啓舊近體卷十

類函二十二

東吳俞安期羨長康編  
上饒王嗣經曰常同輯  
晉安林世吉天迪訂定

宰相部八

子登科第

代賀江陵相公二子登第啓 明馬 朴

玉璣贊化卓隆扈聖之功金殿傳臚茂衍象賢之慶  
橋梓鬱楓宸而濟美芝蘭依槐閣以聯芳色動三台  
聲騰八表恭惟相公閣下心存捧日功懋擎天受先  
皇憑几之言殫忠弼亮當今上委裘之日畢力勛勩

幹旋乾坤於談笑之間宰制縵絃而聲色不動保聖  
躬翊聖德黼宸賴其純忠持相體恢相才鼎軸歸諸  
上理有容彥聖之好無疆社稷之休治鞏金甌道光  
玉鉉重華協帝明良契合于無前一德格天賢喆克  
昌于厥後茲翩翩之式穀並燁燁以揚芬奮身龍虎  
之儔策足英雄之殼盧肇登在第一已奪錦標范質  
屈居十三欲傳衣鉢楚璧交輝而瑞國荆金雙爛以  
充庭科名繼美于郊祁才望更優於軾轍鳳雛並起  
誰不誇丹穴之靈驥子齊驥人愈仰渥注之秀蓋有  
是父有是子宜代掌夫絲綸故難爲弟難爲兄又按  
踵于科第誠若一門八俊何難四世三公曠古稀聞  
於今僅見其辱叨夙眷喜聽佳音仰感美於熙朝羨  
填篋共鳴殿陛望熾昌於德府欣聞鶴並屬箕裘肅  
此擘牋莫勝擊節

賀相國公子聯第啓

明趙秉忠

聖主垂旒門喜英雄入穀上公積閣里傳昆弟鳴珂  
家運視國運齊昌文風乘德風並振眷增黼宸歡播  
冠裳恭惟閣下岳降精英天錫真宰道綜六藝忠瀝  
三朝本經文緯武之猷建旋乾轉坤之勩八方重譯  
藐白雉于日南五氣萃靈來赤麟于天上昔周公明

保冲子猶憑叔父之親彼留侯遭遇帝師未畢君臣  
之義永方嘉懋疇若等倫保國金甌惟一人詢茲黃  
髮銘勲寶鼎在列祖鑒其赤心尤且履豐益謙是以  
晉升咸泰祥鍾元老介瑤觴于八千春慶衍多男兆  
金丹之九百葉翩翩公子寧云王謝芝蘭藹藹吉人  
不藉金張貂珥明經受業張說已識聖童作賦成章  
阮籍久推王佐用能揚眉藜管各以接踵柳袍龍虎  
榜中喜鶴鴿之並翼櫻桃宴上見棠棣之同葩列戟  
擁金吾綺陌爭飛二鳳趨庭原玉汝紗籠系寶珠  
越石偕登侈臨軒之盛事制麻迭草會當軸之奇逢

曾問華蓋接陰百里記荊州之麗豈若彤輝共  
門擅京洛之華多十望擬登仙九重實為知己其夙  
奉葑菲之采深懷葵藿之傾頃絲星使西江祗有斗  
瞻北極式展無文之敬庸馳不腆之詞切冀福躋泰  
階三光叙而四靈畢致仁垂大造百工熙而庶士彙  
征喜近龍顏時展曲江之鑑恩承燕翼代參安世之  
乘

賀蒲州相公加少師及公子登第啓

明于慎行

楓宸錫寵元公崇金鉉之階桂殿傳香哲胤冠璇鼎



之榜福關國祚慶衍家聲恭惟閣下柱石承天斗山  
命世靈鍾光岳并參儲河華之精運協貞元日月啓  
風雲之會文經武緯凝庶績于五辰坤轉乾旋播鴻  
鈞于一氣方泰交之伊始膺異綍以重申大慶覃恩  
載錫元台之祚殊功奏捷榮班上賞之書位晉帝師  
首三公而論道秩兼天宰式百辟以銘勲司鼎軸于  
黃扉柄璇璣于紫殿蓋舜日以爲宅揆而商家所謂  
阿衡允欣麟趾之祥高掇鵠頭之選聖天子重明揚  
之典求儒又于百千卿大夫進賢能之書推經術于  
一二步蓬瀛而叫閭闔獨收海上之熬扶雲漢而持

扶搖疊翥河東之鳳懋堯舜君民之業方傳宋聖德  
之詩邁韋平父子之榮且編漢世家之史其潢汗下  
品山澤矚姿閣啓平津則翹材于曩日筵開東觀叨  
埏埴以多年比請告以旋歸每銜恩而感戀門墻日  
遠屏營湖海之踪伏臘馳之闊雲霄之候望彤扉  
于天上暫阻鳧趨裁尺牘于山間聊陳雀忤

賀蒲州相公子聯第啓

明張鳴鸚

恭惟閣下贊元回國脉首標捧日之功傳世振家聲  
踵報登雲之事纔發京闈以擢秀卽聯甲第以升華  
東閣郎君舉象賢斯爲鮮儷北方學者推濟美或未

能先豈徒襲慶于鬱鬱槐陰尤更增輝于森森棗萼  
某欣聞佳信肅獻蕪詞計行部之屆瓜期擬造門以  
申芹悃鴈序重題鴈塔占仙班必高跨夫難兄鳳雛  
仍到鳳池託相業將求貽乎詰嗣

賀張相公加宮保及兩公子登第啓

明于慎行

龍墀渙命九旂崇上袞之班鶚剡升賢三物冠高文  
之選德榮華國經術傳家恭惟閣下命世大儒承天  
上柱若濟川而立傳爲帝者師同降岳以生申維周  
之翰德符粹益含元氣以如春學海汪洋總有流而

爲長聞兩社以爲輔位映璇樞咸一德以格天福疑  
寶曆聖主虚心而倚昆多方拊手以謳吟舜左禹而  
右臯使宅百揆成師周而保奭是謂三公更綿麟趾  
之祿同掇鵠頭之選射斗南而鑄鉤吳苑空冀北而  
索駿燕臺寶艷連城對奏崑山之壁照分千里雙呈  
合浦之珠家有箕裘豈止繼晁董天人之對國多闕  
闕行且邁韋平父子之榮某蕞爾下材謫焉末學談  
經東觀荷陶鑄以多年請告文園感生全于此日門  
墻天遠能無依戀之衷伏臘飈馳莫展興居之問比  
聞新渥倍切私欣卽在杜門敢忘賀慶侈玉堂之歌

啓集卷之四 卷十  
誦已耳聞宋聖德之詩紬金匱之圖書將首編吳世家之史

賀申相公令嗣登第啓

明余鍾英

惟嶽降神生此申甫惟天眷德保及子孫實關宗社之休慶遠延乎百世微直衣冠之盛福盡萃于一門伏審閣下以賢良三策而爲舉首魏冠儒科起徒步數年而取侯封上聯台宿兼收群策坐廟堂而進退百官妙幹一元補造化而弛張萬物玉我文明之治鏘然熙洽之朝乃睠箕裘易染膏粱之習俾同章布自收翰墨之功恭惟令嗣寶婺流暉金莖擢秀不負

一經之教早成八斗之才場屋所以假途姑將試胸中有用之學文章特其餘事要不爲紙上已陳之言意其氣數循環俾此功名破的乃勸公孫之駕旋登晁董之科寧獨瞻相業之無前且共羨書種之不絕惟君牙乃父紀績太常若公著象賢苴茅申國某猥縻梱寄莫造庭班竊仰鵬騫庸致彈冠之慶倍增雀躍敢忘賀厦之私欣聽臚傳用馳頌臆

賀宰相公子登第啓

明王炳璿

相業格天皇恩顯世元台受祉忠貞傳玉樹之光華  
胄象賢休美濟瓊林之盛屬魏科之峻烈甲第蟬聯

羨英歲以高騰絲綸鼎赫父有作子有迹後先顯世  
德之隆美而彰盛而傳今古擅家聲之遠相門增燦  
儒苑流輝某叨屬梓蔭仰荷鴻休頃奉高呼欣乾長  
安之日茲聞臚唱爭看映陛之雲望巖屏以揚歡附  
微躬而蹈躍伏冀台衡之崇炤奚勝下悃之顙欣

賀宰相子登第啓

明管大勳

伏審懋衍新禧具膺元祉鳳毛濟美科名顯世德之  
光燕翼承休奕葉啓家聲之遠屬英年而邁迹競傳  
心上之經綸列鼎甲以濟華共羨相門之弓冶享大  
名而顯當世繩繩播橋梓之芳熙帝績而潤皇猷焯

煥昭萬古之烈薦紳協忭寰宇交歡某頃入嵩呼仰  
荷隆帡之厚旋聞唱第遙深舞蹈之私末由躬致  
儀徒用神馳竇庶敬裁竿牘贊喜門墻伏祈相慶之  
崇容奚勝鄙衷之顙賀

代賀申長洲長郎登第啓

明唐文燦

恭惟其官大魁偉望碩輔高標扶當宇于守文功成  
化理啓過庭于繩武連陟制科淵源之家學既傳  
百之國功彌著維布和敷潤瑞集斗台肆傳  
光聯奎壁其身羈後事尚需伐于及瓜手勤賀  
遺後于行李此日南宮初進即觀禁中材館之

位年東閣重窺左欣江表相門之出相

少壯香齋我于歸五鼓過歸林歲感之來以備

若到北堂人眼對望麻神高對共為

八官中失此是酒卷策啓 四載文樂

崇谷之福鳴東之調實

崇谷之福鳴東之調實 鳳毛濟濟 名聞遐邇 亦以試問 我輩 亦未白 亦未白

子登科

賀張江陵相公子登科啓 明周世臣

天上麒麟知篤生之有自人間鸞鷲必奮舉以非常  
家聲因懋績而阜昌國運賴多賢而翊戴瑞彌寰宇  
喜溢庭闈恭惟閣下勲高王室忠簡帝心貽多福于  
後昆冠群英于上國兼收連璧誰先大宋科名並茂  
三珠不數諸上品秩臚傳玉陛即看五色雲流名覆  
金甌會見八方風動中州衆嶽知泰岱之最高南極  
數星識斗魁之左朗光昭詩禮之訓允孚忠孝之求  
即此日之茹連一翹獨秀顧他年之柄用累葉同榮

依然萬石流芳一門四相展矣千年積慶三世五公  
閱閱清華邦家盛美其身託疆隅心依廊廟慶蔽父  
之有肖子頌聖主之得賢臣爰竭寸忱敬函尺牘聊  
自將于燕賀未足展乎鶯遷仰冀台光俯垂鑒矚

賀張江陵相公子登科啓

明曾省吾

恭惟相公閣下總廟謨以端百揆方欣霖雨之覃施  
宣庭訓而顯一經又快秋空之奮舉魁名高揭信帖  
早傳棣萼交披芳接南山橋樹奎躔重遶輝增北斗  
台垣卽日對公車連唱臚聲于金殿他年登宦送  
標緒業于玉堂實惟王國之華何止相門之慶恭聽

鳴珂于近里素藉餘榮紆攬轡于遠畿乍聞大喜莫  
伸躬賀聊寓口陳翹望龍門期龍種歲修夫史籍馳  
思鳳閣卜鳳毛世掌乎絲綸

賀申相公令嗣登科啓

明唐文燦

恭惟相公閣下幹斗柄于上台聖代之乾坤歸正傳  
弓箕于東閣名門之科第重光帖播泥金班稱筍玉  
匪直一經著驗此時續翰苑文章猶將數器兼長他  
日延廟廊事業其舊聯魁榜新覩賢書旣托屬于鳶  
蘿因獲交于橋梓奈勞人縻吏役躬賀無由適快騎  
赴公呈手言可致貢箋贊喜畧揚世閱之聲華陳篚

告虔重締年家之契好乞付中涓以通行李容輸下  
悃而效投桃

賀山西相公子登科啓

明潘季馴

忠洽熙朝輔國仰揆衡之重慶流賢胤傳家增奎壁  
之光相府生輝士林胥悅恭惟台座濟時碩輔名世  
真材黃閣妙經綸功與太行並峙紫扉迎雨露澤隨  
四海同流顯明良宰相之勲旣推前輩當晉冀掄魁  
之選又挺後模瑜藹舜中條共羨鳳雛凌漢科逢堯  
丙子快瞻鶚薦橫秋喜溢充閭應繩繩之甲第寶稱  
跨龜實滾滾之公侯其登龍有素躍雀允先獲龍鄉  
書已羨良臣之有子拱聞臚唱再誇聖主之得人槐  
堂春動杏花文陛光芒雲路寵承鳳闕殊恩方眷于  
九重才占鰲頭新命復申于三錫聊陳頌語式表賀  
忱

賀申相公令嗣登科啓

明徐常吉

相府擅家聲偉器久儲于冑監皇都充國寶魏科新  
掇于鄉闈頓空冀北之群特顯江東之俊申公經學  
因詣闕而名彌彰燕客品倫自登臺而價始重祥呈  
璧水彩映木天此時鶚薦鵬搏旣傳官樣文章于翰  
苑他日鸞翔鳳翥將紹王猷黼黻于廟堂偶聽捷音

倍深歡悃身縻外甸難接袂以赴賀班魂遠中台謹  
投箋以宣祝語狀頭原自有種卽覩亞魁連作大魁  
祿命尚猶無涯更祈列輔之並躋元輔

賀申相公令嗣登科啓

明吳之鵬

恭惟閣下大魁偉望碩輔高標降岳生申盤礴山川  
之氣濟川賚弼魁梧廊廟之材故能儒林挾藻譽重  
南金瑞代標符名依北斗神情散朗鸞鷟騰芳之儔  
氣骨崢嶸雪白冰清之操啓過庭于繩武繼前哲之  
扶當宁于守文協成化理淵源之家學旣開石之  
帝業彌弘瑞集斗台光聯奎壁其身勳後事繼前代  
于及瓜手勒賀牋聊遣投于行李此日南宮初筮卽  
覩禁中材館之儲材他年東閣重窺允欣江表相門  
之出相

賀王相公令嗣登科啓

明張季思

台階齊色楓宸倚喬木之榮仙籍浮香桂殿掇琪花  
之秀昭哉世德卓矣國華恭惟閣下象應景星神鍾  
崧嶽正色補山龍之袞德盛格心矢口發梧鳳之音  
名馳拔萃燮調元氣太和在宇宙之間綜理皇風淳  
化軼羲軒之上當年鼎鼐煥乎雲見稚圭此日林泉  
允矣洛居司馬探麟經之闡奧會鵬海之汪洋帝眷



師臣天開昌胤仁符麟趾振振擅奕世之聲才比鳳  
毛翩翩作熙朝之瑞鄉邦推盛事濟美相門京國上  
賢書名登天府勸公車之駕喜看振羽青冥對親策  
之廷竚見奪魁華選其才愧么麼學慚沆漉公門桃  
茂幸樗櫟之兼容台室蘭馨聽華嵩之雅奏方聳壑  
昂霄之日當崇班晉秩之期坐而論道經邦養而協  
和商鼎出則觀光上國生賢復作周楨明德當揚愧  
不文之莫替職司有限恨趨賀之無由敢布赤心用  
通丹慊

賀王相公令嗣領解啓

明王家屏

懿惟令嗣世兄珪璋粹質黼藻雄文夙呈吐鳳之奇  
久擅雕龍之譽頃遊國學遂首京闈榜朝出而名夕  
播于四方錄一傳而紙增價于數倍捷音迅聽驚如  
貫耳之霆病目盱衡喜得開顏之日呼室人而相告  
歡騰子弟親若共于一堂羨國士其無雙才屈英髦  
避易止于三舍是惟天祚明德衍其裕後之祥以故  
世濟巍科標厥象賢之美是父是子鳴初和于在陰  
爾公爾侯巢佇依于阿閣不勝慶抃肅布賀私禮誦  
情長形留神往

賀王相公令嗣領解啓

明馮琦

文明啓畫龍圖宣黼黻之猷經術承家麟筆紹箕裘  
之緒方京國歌鹿苹之雅正明良投魚水之歡有君  
有臣是父是子驂騮開道首登駿馬之臺鵬鸞橫秋  
行入鳳凰之沼掩千群而空北矯萬里以圖南國家  
待為天球大衡士林望為騶虞狸首其守藩在遠無  
由參叩階墀計吏非遙未敢輕修竿牘誼叨世講喜  
倍恒情雖寸絲未陳自斷掃門之跡倘尺書可託敢  
忘賀厦之忱

賀王相公令嗣登科啓

明馬 朴

綠野伏龍霖雨繫寰中之望丹山起鳳絲綸接池上  
之蹤簪紳動色于臚傳鼎鼐增輝于世濟恭惟閣下  
夷清尹任杜斷房謀無偏無黨而贊斗樞功參鼈運  
不競不絀以運天緯助茂龍宸躋聖哲于冲幼之時  
大業允符旦奭定元良于危疑之際宏猷遠謝綺黃  
內順外威四海戴安攘之烈功成身退三吳高出處  
之休臥穩東山不顧蒼生之仰名懸北闕久令黃閣  
之虛元勳赫奕以無前冢胤熾昌于厥後傳家衣鉢  
不出金馬之門繼世台衡又踐玉螭之砌是父是子  
一德相承有君有臣累朝僅見某梗塵微質苦曲餘  
生天遠地懸一介愧稽于鯉牘日升川至三公願叶

于雀環更希仰副宸衷俯從物望壁輪再起竟中書  
二十四考之勲玉燭重調奠聖朝億萬千年之曆

賀王閣下公子領解啓

明陳一鷄

恭惟相公閣下燮調事業經濟文章既培國脉于協  
和遂振家聲于濟美省元芳躅傳麟趾以發解京闈  
胄監英標騁駿蹄而空群冀野彩耀直聯奎壁慶祥  
重集台垣橋先聳而梓復翹右族之高華罕儷桂方  
新而椿未老祉堂之祿壽彌增某年譜托綠世科邁  
會鹿鳴鉅典雖難面覩光榮燕賀微儀聊用手披幅  
幅遙望槐陰于雲表期子姓之復作公卿更占柏信  
于雪中决狀頭之繼成宰相

賀太倉相公召起及子登科啓

明林世吉

瑶樞日麗誇種槐如種德之多寶祚天昌羨折桂同  
折枝之易山川改色朝野騰歡恭惟某官累葉名家  
三朝碩輔任天下重一身久繫安危為帝者師四方  
恒卜出處頃飛丹詔特起東山荐錫金綸晉登左輔  
措太平于紳笏直樹勛猷紆康濟于廟廊不動聲色  
倘漢祖無鄴侯如左右失其手惟武丁有傳說命朝  
夕啓乃心矧爾發祥延祉夢早協乎能罷肆今積慶

累仁芳遂傳于鸞鷲元魁濟美英名香襲蕙蘭作述  
重光偉望高依山斗凡叨簪組俱竊光華某樗櫟散  
材章縫末品杏園錫宴猶慚蠅附當年栢府乞歸久  
遂鴻居遵渚茲恭逢乎盛事敢薄致乎賀私伏願皇  
恩日賁景福時臻世掌絲綸雙覆金甌于紫殿代爲  
柱石長調玉燭于黃扉

代賀張相公子登科啓

明周世臣

天開景運金杓運化於丹青帝眷宗臣玉樹分光於  
黃閣望高橋梓瑞集芝蘭恭惟某官霖雨蒼生棟梁  
宸極調燮乎虞絃商鼎丕暢皇猷蘊蓄乎孔思周情  
遠承道統四海已稱至治九天深鑒精誠懋賞懋官  
俾昌俾熾相門出相步趨接武於巖廊龍種生龍頭  
角繼騰於江漢太史占雲五色元有鳳毛秩宗奏籍  
三湘還須臚唱蓋效美者美常世濟而教忠者忠必  
家傳可望後先庶幾元愷若五桂流芳於竇氏靈椿  
未必擎天暨七貂襲貴於炎京紉袴猶慚著代似茲  
盛事誰繼熙朝某越在疆隅夙膺培植驥頤頰承龍  
袞鹿鳴喜報鯉庭列三台而北斗文成莫贊雲仍之  
盛燦五星而南離奎聚徒欣天賜之隆謹此顯官代  
職稟賀伏乞鴻慈俯賜鑒答

代賀張江陵二子登科啓 明朱 錦

二龍競爽天邊空冀北以無群三鳳聯翩池上擅河  
 東而有譽傳書六服疆吏歡騰奏籍九重天顏喜動  
 恭惟某官化參天地勲冠古今君堯舜而相禹臯賡  
 歌載見弟伊萊而兄周召雅頌靡陳惟社稷倚毗輦  
 上闕三朝景運故蒼穹申眷荆南萃五嶽精英一試  
 禮闈並登天府蔚如雙劍虹光射牛斗之垣珍若二  
 珠寶篚列瑤階之貢豈獨相門元愷實惟聖世荷陳  
 流布裔夷天朝盛事書垂竹帛國史榮名某蒙慶大  
 陶遭逢特慶自闕闈以往日須錦浪千層聞嶽嶽以  
 來庚注卿雲五色少焉伯仲李晉參三殿與篆神淵  
 今者福壽男駢集一堂華封難祝祗深雀躍冥效  
 鳴

東而有參傳書六服禮史款騰泰翁九重天  
恭惟某官化參天地敷冠百令君廷苑而初  
上闕三朝長運改命時中春潤南幸五嶽  
禮闈並登天府如數劍虹光射牛斗之垣  
今春蘇嘉興撫集一黨華性維新承新命  
來與去嘯雲正西心君前中李齊冬三

賀元旦

賀楊閣學年啓

宋周必大

百二十日而為春喜重添于閏月億萬斯年而啓運  
慶五值于初元阻陪後閣之賓遙致先孟之讓恭惟  
某官氣調玉燭膏潤青陽幸來嘒嘒之祺胥樂熙熙  
之衆柳催槐泛記絲光日彩于東官珮解簪抽想名  
號風儀于西洛顧夙契時中之道盍起趨泰內之朝  
亦惟舊人共政之圖歸赴新年太平之賀某居慚老  
伴每辱先施出丙入丁幸附壽星之次乞漿得酒載  
欣申歲之臨頌味攸深指陳曷喻

賀相公年啓

宋周必大

驟遠英袞俄易芳年自惟托迹于甄陶寧不傾心于夙夜今者杓攜龍角日會媿訾當國家正朔遠布之時實輔相年德加新之際中外舉勤于善頌神明必介于殊祥某既未容陪賓客之後塵又不敢修慶賀之常禮姑因尺牘粗述寸誠和氣熙春賴宗工之鈞播東風應律知殘虜之冰消迎拜尚遙坐馳更切冀慎鼎茵之節式符夷夏之瞻

賀宰相元正啓

宋李廷忠

春爲規以園萬物肇開生育之端氣轉鈞而壽八荒允藉燮和之力維時元輔喜對昌辰恭惟某官絕域際天精忠貫日大綱小紀在軍國以恢張正機平衡措華夷于靜謐眷意洽於旒冕茂勲煥乎旂常當勾芒之令肇新宜戩穀之休駢集亟正師垣之拜求扶帝緒之昌某叨領守符阻陪賓祀借陽和於灰律方藉吹噓介眉壽於春觴第塵祝頌

賀宰相元正啓

宋謝枋得

鳳紀更端復對戊寅之曆龍躔回次又新甲乙之司和煦韶光太平佳會恭惟某官禹臯地位伊呂門風精忠簡自帝心大業高于王室理陰陽而遂萬物成

千年生聚之功以道德而位三公應千載明良之運  
同氣慶一堂之聚光輔乾龍遐荒來四海之英助成  
泰象剛辰茂對純嘏駢臻某叨備承流恍驚改歲煌  
煌衮繡莫陪班見之儀楚楚旌麾重拜陶成之造欲  
仰裨於燮理尚勉布於中和

賀政府元正啓

宋陳寶勳

麟筆書元繫萬化循環之本義文畫泰屬三陽彙進  
之初時維兩地之崇翁受層霄之祉恭惟某官望隆  
碩輔道備真儒行夏之時翊九重于密勿班春之令  
翦八表于冲融屬三百六旬交會之初正二十四考  
權輿之始倚登玉鉉永輔環旒某忝綴近宗幸依閔  
覆頌椒有喜阻陪賀葦之爭先削積無文惟祝化爐  
之不老

代賀丞相元旦啓

宋謝疊山

鳳紀更端復覩堯天之曆龍躔回次又新夏正之初  
快視元勳坐膺純嘏恭惟某官勲高王室忠簡帝心  
以道德而位三公應千載明良之運理陰陽而遂萬  
物成億年生聚之功宜誕受于春祺用永扶于皇極  
其一違鈞範五易歲華身在西陲阻效椒觴之祝神  
馳東閣輒輸竹簡之誠



回楊閣學賀年啓

宋周必大

彩勝金幡曾共漢朝之元會蒼顏白髮今齊絳老之  
疑年瞻室邇而人遙殆形留而神往敢期筦記亟治  
書郵恭惟某宮德遂歲新名隨日起春風和氣坐銷  
客子之塵心御柳宮花難狀詞人之妙語佇俛深巖  
之直參裁寬大之書某久矣遊從茲焉間闕郊關相  
望莫陪真率于耆英酒醢前陳乃幸屬饗于盛德具  
爲感戴罔旣敷陳

賀朱相國元旦啓

宋文天祥

龍杓啓歲鳳閣先春八表回寅三台映日見四時之  
燮理適百祿于樞衡恭惟某宮玉燭際蟠鑪鑿動植  
鼎成三足明良適交泰之期星拱六符朝野遊同春  
之域贊化方臻豫大調元又屆履端坎北無垠廓九  
垓之正朔陰陽發育布八風于明時某百粵分猷三  
微溝會作朋三壽觀緝熙夾日之春祺媚茲一人期  
享過十年之帝曆

賀丞相正啓

宋毛敏

王正次春順孟陬而謹始代天理物頒象魏以布和  
宜有百祥來綏一德恭惟某宮寅亮天地鎮撫國家  
經體贊元勲運燮調之化行慶施惠荐更開泰之辰

順受春祺永扶斗極某備負師帥遠託鈞陶春日載陽雖抱衰遲之感農祥是正敢忘勸課之勤

賀右相元旦啓

原作參政

宋文天祥

東角耀芒開三朝之景運西樞齊色轉萬象之洪鈞碩輔均弘方輿錫羨恭惟某官明謨贊化熙績亮天金鼎調元共幹太和之運玉衡測影首參平秩之功頃篋宥密之經綸鼓舞明良之際會薇歌中國壽細柳之春風花滿上林揭扶桑之曉日四方來賀三壽作朋某身逖馳驅神傾塊北拔茅連茹言觀君子之風集杞方苞尚念使臣之遠輪囷致頌藁桔箋忱

賀鄭曾二右相啓

元日

宋李劉

三陽交泰驗正月之始和五福照臨瞻輔星而有耀宜介簡穰之慶用彰弼亮之功恭惟某官德協春溫氣排冬凜參贊陶鈞之化允釐百工沈潛帷幄之謀折衝千里宜對青規之日亟登黃閣之榮某一自西來五逢朔易吳蜀萬里末由稱壽於椒觴蕭曹同心所願垂光於竹帛

賀歐右相啓

元日

宋陳耆卿

元日為三朔肇迎更始之辰閏月定四時俶正歸餘之候衷是履端之殊祉壽于宥密之耆英某官格帝

道尊亮天業懋風生帷幄朋來借箸之籌霧霽邊陲  
一定止戈之畧屬臨穀旦共紀椿齡謂久居四輔之  
間宜高致六符之上首扶乾健永迓泰亨其夙玷近  
藩切依洪化栢椒惟舊雖阻陪獻歲之儀桃李方新  
尚慨望逢春之渥

賀丞相元旦啓

宋文天祥

帝堯授曆肇開平秩之端周公爲師實主泰和之運  
光華絕席垓北方維恭惟其官玉燭祭禘鉤回動植  
調元神鬲心包太極之春捲日扶桑色照芬香之角  
條鬯吏南之温厚填箎上下之明良拜晉國太夫人  
慶祥符之真宰邁路公平章事登元祐之昌期億載  
敬休八荒開壽其囿身洪播稽首獨班三陽君子泰  
來仰贊茹茅之盛四牡王事靡盬俯同苞杞之生致  
賀輪困交忱稿結

賀楊丞相元旦啓

宋方岳

鳳曆瑞頒鴻鈞氣轉皞皇用事換新歲之韶光魁宰  
調元迎太平之嘉會三陽鬱勃萬宇光輝恭惟其官  
伊呂門風禹臯地位同氣慶一堂之聚光輔乾龍包  
荒來四海之英助成泰象剛辰茂對純嘏駢臻其叨  
備承流恍驚改歲煌煌袞繡莫陪班見之儀楚楚旌

慶賀類例卷一  
慶重拜陶成之造欲仰禪於燮理尚勉布於中和

賢帥

來明登

維材八若

慶賀類例卷一

賀內閣元旦啓

明

鳳紀更新萬宇慶陽回之節麟車煥采百年當道泰  
之期璇杓默運于孟陬玉律適躔于太簇恭惟閣下  
黃閣宣猷宅揆總邦家之治青宮翼贊秉鈞協文武  
之司霖雨共濟于明時鹽梅協恭于昌運人仰伊周  
之日化行草木之春淑氣初催條風始屆望慶雲而  
企足瞻台斗以馳情尺牘遙緘微忱上達

賀張蒲州元旦啓

明吳之龍

斗柄指寅瑞應彤雲扶旭日台英現丙光聯南極貫  
薇垣歡溢八埏福崇九鼎恭惟門下昂宿儲靈喬松

啓  
鍾粹乘時攄素幹元化以撫五辰矢志存丹壑至仁  
而噓萬類袖中五石補天輪寅亮之猷階上六符燮  
鬲幹回陽之軸當一氣協乾元之始會三陽同泰道  
之亨元首股肱載賡明良之韵第祿純嘏永矢卷阿  
之歌某幸際垂衣才非補衮仰黃扉而瞻依靡極竊  
慚義馭之更新望素雲而風勵聿殷願祝箕疇之敷  
錫輒因竹簡代致椒銘末由報稱于陽噓惕爾馳神  
于日積

賀張相公正旦啓

明徐州牧

紫禁春先報條風而改歲黃扉日近收淑景以登年  
惟四序之推遷定三公之燮理和敷九土喜溢千官  
恭惟師相閣下休休雅度赫赫具瞻芳聲蚤擅平青  
錢重望彌高于白馬傳星申嶽當八柱之崇階周宰  
伊衡冠五雲之上列肆贊化已臻乎豫大乃授時又  
屆于履端率土同春敷天奉朔想嘉猷入告于后榮  
已傾樽知景福有命自天寵先賜筋葦桃在戶引玉  
鉉之祥煙椒栢稱觴分金莖之瑞露某希光梓里席  
芑槐陰感日月之方除欣同陽表觀地天之交泰喜  
共春生迹遠鷓行未庭趨以百拜情均燕賀惟時至  
而一鳴敢託飛緘聊攄賀悃式是百辟大年將寶曆

俱增媚茲一人遐福共金甌永固

賀四閣下元旦啓

明裴應章

龍躔布朔一元開更始之辰鳳閣疑禧萬象際維新  
之會地天交而春回海寓明良合而化洽唐虞草木  
欣榮臣民忭舞恭惟閣下功參覆載德合陰陽起心  
上之經綸帝載熙而天工亮霈寰中之雨露康衢歌  
而擊壤謠欣逢泰運之交共迓履端之慶天開黃道  
三陽瑞藹于三台日麗紫宸五福疇分于五位其猥  
惟枯朽辱荷栽培阻隔鳳池遙荷槐階之迓祉鷄栖  
麋谷頓承葭管之吹溫聊綴蕪詞效敝椒頌伏願仁

單時夏世奠如春旋幹璣衡翫贊四時之玉燭調和  
鼎鉉永完萬載之金甌

賀中相公元旦啓

明徐州牧

太皞司辰二朔同臨首祚上台拱日九重獨得先春  
萬方共群蟄以俱蘇五福與諸陽而並進恭惟相公  
閣下功同閎散學鄧蕭曹星列六符慰蒼生久沾霖  
雨鼎成三足運赤子共濟鹽梅明良適泰交之期海  
宇固同春之化邇惟孟陬貞始青祗履端迓淑氣于  
東郊陽回雉雥依清光于左掖日近龍飛侃侃譚經  
定奪漢廷之席孜孜論道應傳魏殿之樽祥符自集

于高門未須僂木彩勝還分于內苑寧羨鬼丸其夙  
忝續貂時承策蹇瞻龍杓之曉轉知七政皆運于台  
衡觀鳳曆之春頒想六氣盡調于樞筦敢摠賀臆輒  
矢歡聲天工亮則陰陽和風雨時八表被熙熙之化  
相道得則子孫保黎民利九圍歌斷斷之風

賀相公元旦啓

明馮琦

敬授人時陽德啓三微之旦疇熙帝載泰階回四海  
之春惟是篤棊之元臣能歛嘉祥於上日蓋帝之出  
震開群生勾甲之萌而嶽之降申幹七政成於之柄  
有美龍圖之業新頒象魏之條曆象日月星辰守仙  
之休和咸萃勗成要荒侯甸闡輔之沾被充多其叨  
守畿南如在宇下敢陳芹獻仰代椒觴又我蒸民繫  
股肱之是賴錫公純嘏與社稷以咸休

賀相公元旦啓

明王演疇

恭惟臺下心涵太始道合元和一德格天疇不望躋  
六合于仁壽三䟽耀日衆方倚登四海于雍熙當赤  
奮之回春正青陽之協吉條風轉蕙大塊召我以佳  
時善類拔茅主人須公而翊運其參苓下品桑梓棄  
材縹緲孤鴻久安涼德馳驅老驥豈望和鸞欲假虎  
豹之在山何似魚龍之如夜敢將葑下問汛梅邊翠

栢紅椒已羨逢春之白傳紫泥丹詔行瞻歸袞之裴  
公以茲鳴言庶將忤賀

代賀相公元旦啓

明許以忠

正朔奉九州淑氣光盈于台府陽春彌六合晴光溥  
散于寰區福與歲增道隨時泰恭惟閣下象緯儲精  
風雲應會三槐拂座香和玉鉉之梅六琯調元候協  
金門之竹邇者辛盤餞臘粉荔迎年太族司辰舜陛  
初鳴瑞鳳勾芒布令堯階始發仙萼燮調邁丙相之  
功郊牛謝喘煦育過趙侯之惠野雀還生華閣迎祥  
襍祓寧煩于桃梗御庖分寵芬芳共入于椒觴其濫  
役南都欣逢上朔仰春暉而拭目遠藉餘光攄賀  
以颺言恭申鄙悃念主上之春秋方富股肱永賴于  
元臣惟君子之福祿來崇膏澤時流于下土

候歸德相公元旦啓

明劉國縉

青郊布令淑氣先到羨梅紫極調元陽春遂同部屋  
地天開泰歲序履端恭惟大師閣下三朝碩輔一代  
偉人嵩岳降而申生周邦爲憲河圖負而世出斯文  
在茲身繫宗社安危動關世道顯晦鼓鑄太和之運  
日挾龍飛幹旋元化之機時揚虎拜乾坤盡歸整頓  
官府總屬台衡玉燭萬年春宇內共嬉化日金莖一



杯露御前分作椒漿夷夏同聲羨福祿又增商鼎君  
相造命知閭闔無事靈桃真千古魚水之歡豈一時  
明良之遇伏念其寰中弱植柱下迂儒謬荷嗟培攬  
轡銜兩河之命周爰諮度驅車逢四始之辰披鳳曆  
而莫遂趨承望龍門而難禁忭舞敢循故事恭賀新  
禧雖尺素自愧乎蛙鳴廼寸丹實符于燕喜伏願勳  
庸歲月俱增道德韶華共茂休休一介輩太山于四  
維諤諤九重致明主于三代其臨緘無任云云

賀座師殷相公元旦啓

明于慎行

青規律轉祥開獻歲之朝綠野春融慶集詞元之府

恭惟老師閣下貞元應運海嶽鍾英化贊璇璣應三  
陽而啓泰功成鍾鼎含四序以同春况逢花甲初週  
仙筭重標干寶曆且見芝田逾茂韶華早發于瓊枝  
某身廁門墻地親里閭念東風之桃李近列園林望  
北極之星辰重回斗柄敬獻椒花之誦聊申芹子之  
誠

賀陳相公元旦啓

明夏相虞

鳳曆更端五彩炫卿雲而並耀龍躔回次三台拱帝  
座以長春行迓熙和坐膺純嘏恭惟閣下亮天業懋  
格帝道尊屬左旋三百六旬交會之初正中書二十

啓集類四卷一  
四考權輿之始栢傳天上獻壽杯稱萬壽梅報殿中  
調元日值初元誕受春祺永扶皇極其迹阻西郇神  
馳東閣五緯天開黃道莫罄獻椒六符階轉蒼精更  
祈連茹

賀沈相國元旦啓

明連繼芳

六甲逢辰值堯年紀曆之首三陽起丙當夏正建寅  
之初燮理功高寵綏福厚恭惟閣下取象魁三鳩鵲  
恩來九陛去天尺五麒麟業峻千秋天子萬年開泰  
之辰春王正月履端之始曉雲催淑氣凝舒長景鐘  
聲春仗轉條風早見上林樹色三分栢酒浸玄醪已

實堯樽千樹梅花和玉羨旋調商鼎御青陽左个具  
瞻鳳鳥凝圖占紫氣西山會見麒麟啓殿其奉行正  
朔知七政盡運台衡式藹晴光想六符都呈階陛敢  
抒賀臆聊效頌聲蠟燕懸羊聊同風干仁宇獻鳩放  
雀用廣德于春臺望紫閣以神馳托彩霞而拜瀆

賀沈相公元旦啓

明萬世德

卦逢乎泰見天地之交坤承乎乾際明良之會東郊  
迎淑氣左掖麗晴光恭惟閣下鉉路符金碑之夢火  
城光玉燭之華道德位三公躬司造化陰陽育萬物  
氣吐玄工震上青遼揭扶桑之曙日春先黃閣朗維

枳之台星和氣九埏元亨三事其西陲羈迹東閣馳  
神阻獻椒觴仰陳栢頌伏願手中五色補天恢冥亮  
之絃階上六符其兩潤陽春之德

賀張相國元旦啓

明汪道昆

斗柄指寅瑞應彤雲旭日台躔現丙光聯南極星垣  
歡塞八垠慶浮九鼎恭惟閣下袖中五石補天藉劍  
履之辰階上六符調鼎和鹽梅之味鴻鈞轉白一氣  
兆一德之交孚鳳曆頒向三陽表三才之共協某才  
非補衮遇際垂衣瞻舜日于黃扉仰堯天于紫闕聊  
因竹簡代致椒銘草荅春輝葵傾夏煦

賀余姚相公正啓

明胡植

碩輔秉鈞衆羨補天神手嚴師弼治普瞻浴日歸勲  
覆名姓于金甌調陰陽于玉燭面槐非偶慶龍衮以  
加躬夢松有年欣鹿幡之載道時推傅伊復起遠邁  
房杜同心慶溢朝紳歡騰海表恭惟某官瀛洲清選  
聖世歸科抱韓范所未究學術而不矜際孔孟所未  
遇昌期而不矯推賢若轂倚重如山侍彩占雲光遂  
膺夫送日陳猷披日愧實切于捫心明學術以幹化  
原經筵東序振紀綱而端國本位正青宮仰懷柔遠  
之謀苗夷納款不贊太平之治蒼赤興歌泰階六符

上厯九重眷顧六府三事九孚萬民具瞻濟濟庶僚  
盡屬公門培植休休盛德不遺下里迂踈顧某才本  
庸流識慚辨水隨波清世拜漕憲已覺汗顏尸位素  
餐改膳卿益增慚色瞻太山而仰止飲滄海以知源  
敢不愈勵初心期答熙朝之寵賚彌堅晚節不負上  
相之裁成頃者候屆春和官依寒局才非七步效作  
頌而採椒花敬達寸緘布微忱以獻芹曝盟心向日  
拜手臨風

賀張江陵啓

元日

明交大綸

聖祚中興快覩三陽之會台垣翊運欣承一德之猷

雨露回春華夷景仰恭惟某官德維天紀學爲帝師  
玉燭調而歲穀屢登泰符集而邊烽永息誠萃衡嶽  
之間氣殆吞雲夢於胸中允矣明光勤施升主德於  
羲軒之上焯哉和恒篤棊奠國錄於泰山之安某材  
同樸橄器若蹄涔幸薰里閭之高風獲潤漢江之餘  
浸思源飲德鏤骨銘心茲違曠以周星實馳神於積  
日恩深陶鑄曷勝銜結之情勢隔雲泥未遂消塵之  
報輒因鴻翼敬貢蟻忱惟願爲國葆光若時崇化使  
弗祿純嘏聿賡卷阿之歌而聖主賢臣再上雍容之  
頌

具品 賀呂相公啓 元旦

明支大綸

重華協帝萬年新鳳曆之期同德享天一氣轉鴻鈞  
之運圻甸春回工僚喜溢恭惟某官中興名世平格  
偉儒依日月以攄丹久著又安之績坐微垣而訓德  
共推輪翼之忠際此履端適逢泰始惟願忠願純嘏  
孚九重倚毗之隆宣節元和慰四海瞻依之重鎮瑤  
圃而未固衍麟趾於無疆某夙叨春育載見歲華身  
在西江未附椒觴之祝神馳北極聊傳梅信之春禱  
頌實深兢惶交集自慚瓊瀆伏冀台融

賀冬至

賀丞相長至啓

宋李廷忠

日至自南陽生於子浮灰應黃鍾之候亨運有闔鳴  
玉趨紫宸之朝寵光交輯恭惟某官大為民極高出  
儒流忠純之謀上格于天心直方之德下同于坤體  
邊庭臥鼓廊廟垂衣化工允藉于燮調帝載聿臻于  
熙洽運三辰轉三統悉歸塊圮之中合八能陳八音  
已驗孳萌之始昌辰茂對嘉祉具綏用孔子其周乎  
侵疆自復安劉氏必勃也與國同休某久託鈞泥空  
縻邊粟方踐長之有慶徒仰高之是勤敢憑魚腹之

傳僭申鷓尾之賀

賀張參政長至啓

宋李廷忠

一陽在地卦當剝復之交萬寶得春氣應虛危之次  
帝心昭格君子類升恭惟某官物望穹隆人流超妙  
以道任天下之重有德致朝廷之尊律呂風雲式茂  
贊元之業梯航山海聿昭懷遠之謨屬亞歲之葢儀  
端中階而受祉天如欲治當今舍孟子其人復何憂  
中國相司馬矣某謬乘一障阻望六符方密借於施  
生可默無於贊頌不揆作牋之陋聊同獻襪之誠

賀陳相公冬至啓

宋張綱

賀冬至

賀丞相長至啓

宋李廷忠

日至自南陽生於子浮灰應黃鍾之候亨運有闐鳴  
玉而此紫宸之朝寵光交輯恭惟某官大爲民極高出  
儒流忠純之謀上格于天心直方之德下同于坤體  
邊庭臥鼓廊廟垂衣化工允藉于燮調帝載聿臻于  
熙洽運三辰薄三統悉歸塊土之中合八能陳八音  
已驗孳萌之始昌辰茂對嘉祉具綏用孔子其周乎  
侵疆自復安劉氏必勃也與國同休某久託鈞泥空  
糜邊粟方踐長之有慶徒仰高之是勤敢憑魚腹之

唐書卷之四十一  
傳僭申鷗尾之賀

賀張參政長至啓

宋李廷忠

一陽在地卦當剝復之交萬寶得春氣應虛危之次  
帝心昭格君子類升恭惟某官物望穹隆人流超妙  
以道任天下之重有德致朝廷之尊律呂風雲式茂  
贊元之業梯航山海聿昭懷遠之謨屬亞歲之葢儀  
端中階而受祉天如欲治當今舍孟子其人復何憂  
中國相司馬矣某謬乘一障阻望六符方密借於施  
生可默無於贊頌不揆作牋之陋聊同獻祝之誠

賀陳相公冬至啓

宋張綱

召陽以律應復卦之初爻求端於天建周正而布治  
惟時碩輔與國同休恭惟某官道貫三才智包九德  
棟隆廣廈納四海于幷幪坯就一陶鼓群生于橐籥  
神人底豫夷夏輯寧茂對令辰備膺嘉貺某叨恩洪  
播屏迹窮鄉緬想槐庭阻造承顏之列恭馳竹素敢  
稽事貴之儀

賀丞相冬至啓

宋方秋崖

荔挺芸生一陽初復柳舒梅放萬象皆春有皇播物  
之仁盡入迎圭之景恭惟某官識參造化德備中和  
衆正用而小人消君臣胥慶群陰退而吾道長天地

開除一氣洪鈞八荒壽域其藐為宗翰莫望台符塊  
比無垠但覺觀臺之雲煖太平有象永依化國之日  
長

賀宰執冬至啓

宋方岳

曉奏觀臺蒼籙紀五雲之瑞暖回宮壁洪鈞轉一氣  
之春維時元臣克受蕃祉恭惟某官履日月之會見  
天地之心坐廟堂而進退百官盡消群慝幹造化而  
開張萬物潛復初暘茂迎愛景之長有衍丕圖之慶  
某屬分樞寄遙企階符天子之宰通神明諒發統  
太平之期當今日式對亨嘉

賀朱相公冬至啓

林下

宋周必大

羲畫分爻陽應地雷之後周正建子法垂象魏之和  
品彙時亨賢哲道長恭惟某官功存廟社名在  
坐迎日至之辰順履朋來之福仰梁公于北斗獨推  
耆德之高起謝傳于東山佇慰蒼生之望惟茲朽鈍  
夙荷眷知千里瞻言短羽莫陪于燕廈八年遠迹舊  
陰徒想于桃蹊

回鄭少傅啓

林下

宋方岳

春浮緹室遄復新陽天啓經惟有皇奮弼帝王之學  
造化同功恭惟某官治格端平身為元氣至今化日



宮線屢添共後書雲袞衣再入與國無極對天之休  
其久問歸期聿逢亞歲土圭莫測坎北無垠調鼎重  
來太平有象於樂壽豈未央頌言

賀參政冬至啓

宋文天祥

龍杓麗曉天開泰內之陽驛騎明春星起軫中之壽  
和薰青瑄喜動黃麻恭惟某官心會陽宗身扶人統  
黻明帝袞迎瑞日於東郊縹煥公主照蒼精於左角  
卷劍氣玉煙之彩增繡裳赤舄之榮東作有三百六  
旬陶鈞一轉中書歷二十四考鼎鼐重新戒前路之  
鸞鳳沸歡聲於童馬其喜逢鷄朔愉贊熊旂光近火

城又獻大椿之歲寒噓雲吞敢忘寸草之春跂賀心  
馳箋忱喙短

賀太師冬至啓

宋徐積

瑄灰浮煖一陽初動於黃鍾圭景迎長萬彙咸熙於  
化國應受宜民之祿孰先同德之賢恭惟某官運契  
千齡仁漸九有雍容廊廟轉一氣於鴻鈞鼓舞華戎  
調四時於玉燭祥紀卿雲之瑞德侔愛日之輝適三  
歲以視祠環百神而受職誰誰肅肅方勤顯相之儀  
簡簡穰穰遂叶朋來之慶某忝司外朴邈在閩陬乘  
使者之輶顧銜恩而有地望翹材之館繫薦壽以無

階頌詠攸深名言罔既

外國惠受宜男之

能天聖教一期願效黃鵠

賀太相冬至啓

宋翁

鼎爨冰泉

如又精大群之燕寒雲舍頌志草之春

賀陳相國冬至啓

明周仲士

歲在牽牛辰居狼駮北杓指朔應四十一刻之初南  
景留冬滿三寸九分之管青臺占候于夜半黃宮驗  
氣於日中柔荔芳芸協曲成之令節開陽甄曜赫圓  
宰之深仁當歲亞開祥敢續踐長慶初至臨日月合  
璧應進陽德排群陰玉爲筋晶爲盤式淡玄酒之味  
和之瑟雲之舞正希大音之聲益昭補衮精忠宮添  
一線愈著迎祥事業樹影八神某知斗司調燮之功  
觀陽敷孳萌之漸五雲多處瞻五福以齊天三台正  
中願三多之在宥八千歲莊椿之壽敬托魚緘十二

日  
日  
日  
日  
日  
日  
日  
日  
日  
日

啓雋類區 卷十

笛嶰竹之鳴先雁鳳律

一泉愈清也半半業樹源八軒其狀卡同賦  
味之悲雲之戰五帝大音之聲蓋出清  
響劇進則斷非精劍正爲悅曲然益左  
率之采二當暴亞開羊難齋身總所至  
康然日中榮蕩共共湖曲火之令  
景留冬歲三十八人之管青臺古刻于  
歲在率中司吾身刻非以計騰  
實則財國冬至啓

與周中士

7

